

# «A lunga vista fa quella strategia donn»

Gastro Grischun: Radunanza da delegads

DA GION NUTEGN STGIER / ANR

■ **Reelecziun onuraivla per il president Franz Sepp Caluori. El resta vinavant a la testa da l'uniun cun bunamain 1000 commembers. Qualitad saja er en l'avegnir il recept da success. Ad acta haja el mess la reintroducziun da la patenta d'ustiers.** Ier ha gì lieu a Müstair la 104ava radunanza da Gastro Grischun. Dapi trais onns president da quella federaziun chantunala è *Franz Sepp Caluori* e mainagestiun è *Marc Tischhauser*. En ses pled da bainvegner è Caluori sa mussà cuntent da la preschientscha da numerusas persunas da la politica, sco per exempel cusseglier guvernativ *Jon Domenic Parolini*. Tranter ils blers giasts eran er ils quatter novs candidats per la regenza grischuna *Marcus Caduff*, *Andreas Felix*, *Peter Peyer* e *Walter Schlegel*. Ils salids da l'uniun tetgala, la Gastro Suisse, èn vegnids dal directur *Daniel Borner*. A pled è er vegnida *Gabriela Binkert*, la presidenta dals ustiers da la Val Müstair e da l'uniun da mastergnanza.

## Passiun e bler cor

Caluori ha ditg en ses pled annual ch'els ustiers hajan ina bella professiun e sin la branscha da la gastronomia dastga mingin esser losch. Per esser in bun ospitant d'ovri dentant blera passiun, bler cor e feu. I dovra però er la voluntad ed il curaschi per midadas. En l'avegnir hajan ustiers ed ustieras d'esser pli averts, moderns ed innovativs. Il giast pretenda oz na be ina buna alimentaziun, mabain spetga el in bel temp, aventuras e divertiment, ha menziunà il president dals ustiers grischuns.

## Uras da lavur pli attractivas

Per far las professiuns da la gastronomia pli attractivas e cunzunt per impedir che adina dapli forzas professiunalas bandunan la gastronomia e midan en in'otra



Marc Tischhauser, il mainagestiun da Gastro Grischun.

FOTO G. N. STGIER

branscha dovran la gastronomia e la hotellaria uras da lavur pli attractivas. En cuminanza cun la HTW Cuir saja Gastro Grischun londervi cun in project da chattar er per la gastronomia in model per uras da lavur pli flexiblas, ha accentuà Caluori. La digitalisaziun saja bain er per la gastronomia da fitg gronda impurtanza, dentant segir na il med universal. Ella saja in agid per la comunicaziun cun il giast e cunzunt er per simplifitgar il decurs da lavur. Il contact persunal tar ils giasts saja er oz anc adina indispensa-

bel e necessari, ha ditg il deputà e president dals ustiers grischuns. Qualitad, quai saja er oz anc adina la pli gronda valur en la gastronomia. Gist perquai chapescha el betg la strategia da pretschs bass da singulas pendicularas da noss chantun. A curta vista saja quella strategia bain in enritgiment, a lunga vista dentant fetschia quella politica da pretschs donn a l'entir turissem, ha menziunà Caluori. Per la gastronomia vala er en il futur be in pled: qualitad, e cun ina buna qualitad saja er pussaivel d'esser meglier

che la concorrenza. Quai che pertutga la reintroducziun dal curs «light» per far la patenta d'ustier na saja per in temp nagingin tema pli, ha ditg Caluori. El vuleva introducir danovamain il curs per far la patenta d'ustiers, il curs ch'è vegnì dimess en il Grischun il 1998.

## Duas novas suprastantas

Cun grond applaus han ils preschents reelegì Franz Sepp Caluori per in ulteriur bienni da trais onns sco president da Gastro

Grischun. Confirmads sco suprastants èn vegnids *Alexander Hösli*, *Domat*, *Bruno Raselli*, *Le Prese* e *Primo Semadeni*, Bever. Da nov per quel gremium han ils delegdas elegì *Fabia Caduff*, Sur-saissa ed *Annalies Bäsch*, Tavau. Sa retratga sco suprastanta e quai suengter sis onns è *Tamara Henderson*, Tavau. La commemoranza d'onur da Gastro Grischun han retschet l'anteriur mainagestiun *Fluregn Fravi* e *Georgette Dedual*, ella ch'è stada 35 onns la bun'olma da l'uniun en il biro principal a Cuir.